

Headline	Modul pembangunan kenaf pertama di bangunkan		
MediaTitle	Utusan Sarawak		
Date	22 Apr 2016	Color	Full Color
Section	EKONOMI	Circulation	37,981
Page No	E1	Readership	113,943
Language	Malay	ArticleSize	441 cm ²
Journalist	N/A	AdValue	RM 2,260
Frequency	Daily (EM)	PR Value	RM 6,780



Modul pembangunan kenaf pertama dibangunkan

PADANG BESAR: Taman Industri Kenaf Bersepadu (1KIP) yang bermatamata menajana sumber ekonomi Perlis sebanyak RM5 juta setahun, bakal dibangunkan di kawasan Chuping.

Menteri Besar Datuk Seri Azlan Man berkata projek itu yang merupakan modul pembangunan kenaf pertama di negara ini yang meliputi keseluruhan rangkaian, bermula daripada penanaman benih sehingga pemasaran produk berkenaan.

"Berdasarkan kajian dan penyelidikan yang dijalankan, Perlis optimis industri ini mempunyai potensi yang cukup luas dan akan memberi manfaat kepada rakyat, termasuk menyediakan peluang pekerjaan," katanya kepada pemberita selepas merasmikan majlis Industri Kenaf Rakan Rakyat (IKRAR) di

perkampungan Asnaf Batu Bertangkup, Chuping di sini hari ini.

Turut hadir Timbalan Menteri Perusahaan Perladangan dan Komoditi Datuk Noriah Kasnon, Pengerusi Lembaga Kenaf dan Tembakau Negara (LKTN) Datuk Adhan Kechik dan Ketua Pengarah LKTN Samsudin Noor.

Azlan berkata usaha LKTN untuk merangsang kemajuan industri kenaf disambut baik berdasarkan impaknya untuk menggalakkan pembangunan ekonomi, pertanian, taraf hidup rakyat dan kemajuan negeri.

"Kerajaan juga telah melihat potensi cerah projek ini berikutan iklim di kawasan utara Perlis ini sesuai untuk tanam kenaf. Penduduk juga digalakkan mengusahakan tanaman kenaf secara kecil-kecil sebagai pertanian alternatif.

"Sebanyak RM3 juta dilaburkan oleh LKTN untuk menggerakkan projek yang bakal dimulakan Ogos ini dengan penanaman kenaf yang meliputi kawasan seluas 420 hektar di Lembah Chuping," katanya.

Terdahulu, Adhan berkata LKTN melihat Perlis sebagai negeri yang paling berpotensi untuk membangunkan projek berkenaan bagi memenuhi kehendak industri tempatan dan eksport.

LKTN akan memastikan bantuan yang diperlukan disalurkan bagi merealisasikan projek ini termasuk pengeluaran biji benih kenaf, pengeluaran fiber berkualiti tinggi melalui 1KUR (Program Kenaf Untuk Rakyat) serta insentif bekalan batang kenaf dan pinjaman mesin memproses.

"Bagi pengeluaran produk IKS (Industri Kecil dan Seder-

hana) berasaskan kenaf, Pusat Pertumbuhan Desa Batu Bertangkup menyediakan pelbagai kemudahan untuk mereka dengan tumpuan bantuan ke atas pengeluaran pulpa daripada empulur kenaf sebagai produk perkakasan terbiodegradasi," katanya.

Beliau berkata penanaman kenaf juga memberi pulangan yang lumayan iaitu RM500 satu tan, dengan kawasan seluas sehektar mampu menghasilkan 30 tan.

Kesemua hasil dijamin, sama ada oleh pemaju industri atau LKTN sendiri, katanya.

Pada majlis itu LKTN turut bertukar dokumen perjanjian kerjasama dengan Institut Penyelidikan Perhutanan Malaysia (FRIM) bagi pembangunan projek perintis pengeluaran pulpa kenaf di Perlis, disaksikan Azlan dan Noriah.

– BERNAMA



MENTERI Besar Datuk Seri Azlan Man (tengah) bertanyakan sesuatu mengenai proses penghasilan Kenaf kepada Ketua Pengarah Lembaga Kenaf dan Tembakau Negara Samsudin Noor (kiri) pada Majlis Perasmian Industri Kenaf Rakan Rakyat (IKRAR) di Perkampungan Asnaf Chuping semalam. • fotoBERNAMA